

## **Igl cumportamaint dalla populaziun an situaziuns da castastrofa u da crisa**

### **Sen fudamaint digls evenimaints deplorabels ainten l'Ucraina èn diversas persungas sa drizzadas agl cumegn cun dumondas concernent igls refugis (schlers da protecziun) e las tabletas da jod.**

Per igl mument dattigl dalla vart digl cumegn da communitgier nigns detagls resp. navot da nov. Igl cumegn vign sustignia digl cantun Grischun e dispona da glistas da controlla e directivas da cumportamaint pigl cass da crisa. L'attribuziun digls refugis vign communitgeida alla populaziun pir cura tgi la situaziun relevanta per la politica da siertad pretenda chegl. Per tot las abitantas ed igls abitants digl cumegn da Surses stat a disposiziun en refugi. L'attribuziun succeda dantant pir schi chegl vign decreto digl Uffezi da militer e protecziun civila ed alla basa dallas datas digls abitants actualas da chel taimp.

Igl concept «jodid da calium (distribuziun da tabletas da jod) è nia controllo ed actualiso digl cantun. Igl cumegn vign a distribueir chellas tabletas da jod alla populaziun pir sen decret dallas instanzas cantunalas. Pigl cass d'evenimaint ò la suprastanza defino schinumnos "lis logistics da distribuziun" ainten las singulas vischnancas an Surses. Chels lis servan per distribueir products resp. per garanteir la communicaziun cun la populaziun an cass da catastrofas u da crisas.

Cun simplas maseiras e cun igl dretg sa cuntigneir ègl pussebel da redutgier la dimensiun da donns, p.ex. tar mancanza d'electricidad. Infurmaziuns davart maseiras da preparaziun e da cumportamaint tar crisas èn da cattar sot <https://www.alert.swiss/>.

Pondere tar las Vossas preparativas tgi sa tracta d'ena situaziun excepziunala, ainten la quala la limitaziun da donns ò ampresa prioritad. Cunzont la periclitaziun da persungas ègl dad impedeir. Perchegl ègl impurtant da metter las dretgas prioritads.

Pondere perchegl

- scu tgi Vous savez far en past tgod sainza current,
- scu tgi Vous savez garanteir l'illuminaziun necessaria,
- scu tgi Vous savez tadlar las novitads las pi impurtantas,
- scu tgi Vous savez scaldar aglmanc ena tgombra an Voss tigneirtgesa sainza current,
- scu tgi Vous savez tigneir an funcziun indrezs, apparats e systems an cass d'interrupziun digl current (p.ex. apparats medicinali scu apparats da far dialisas, indrezs d'alarm, pompas, portas-garascha, etc.)

Malgro las preparaziuns dalla branscha d'electricidad e dallas maseiras statalas ègl ainten l'atgna responsablidad ed aint igl interess da mintga singula persungas da proveder da moda adquata per situaziuns da crisa.

Igl cumegn da Surses ò installo scu med da communicaziun en sarvetsch d'infurmaziun gratuit per SMS, per saveir infurmar la populaziun da moda sperta an cass d'evenimaints. Ulteriouras infurmaziuns sot:

<https://surses.ch/RM/politica-administraziun/partiziuns/protecziun-populaziun.html>